

Scéal, Scéal, Scéal...



29 Feabhra 2024 || Eagrán 186

Scéilíní, nuaiocht agus fógraí as Cois Fharraige.

Amárach!

MAIDIN CHAIFE

- Cois Fharraige -

Bláth Fiáin, An Spidéal
Dé hAoine 1 Márta
11r.n.

Caidreamh 's Comhlúadar!
Fáilte roimh chách.



LÁ GAIRME CHOIS FHARRAIGE 2024

Bhí an-lá againn ag Óstán Chois Fharraige Dé hAoine seo caite ag foghlaim agus ag fiosrú maidir le deiseanna fostaíochta ar leic an dorais, i gCois Fharraige. Tháinig thart ar 100 dalta, de chuid na Sraithe Sinsearaí, ó Choláiste Cholmcille agus Coláiste Chroí Mhuire chomh fada leis an óstán lena bhfiosrúcháin féin a dhéanamh, ag caint agus ag plé cúrsaí oibre agus fostaíochta le breis is scór go leith ionadaí ó eagraíochtaí agus comhlachtaí áitiúla. Ár mbuíochas leis na hionadaithe ó na heagraíochtaí seo a bhí linn a thug a gcuid ama go fial flaithiúil le roinnt ama a chaitheamh le haos óg an cheantair len' iad a spreagadh agus a mhealladh! Bhí meascán iontach d'earnálacha i láthair chomh maith - idir na healaíona, bitheolaíocht/bithéagsúlacht, leigheas, na seirbhísí poiblí, tógáil, fáilteachas agus neart eile nach iad. Maidin fhiúntach, shuimiúil agus thaitneamhach a bhí inti!



AN SOLAS DEARG

Léireoidh Aisteoirí an Spidéil *An Solas Dearg*, le hAntoine Ó Flatharta as Leitir Mealláin i Seanscoil Sailearna ar an 15, 16 agus 17 Márta. Bundráma Gaeilge é seo agus tá an Ghaeltacht, roghanna agus mianta na hóige agus tionscal na méan á gcíoradh ann. Seisear pearsan atá ann agus ‘siad Caitriona Ní Dhomhnaill, Séamas Ó Scanláin, Cormac Ó Comhraí, Treasa Bhreathnach, Bairbre de Barra agus Seán Ó Gráinne a bheas ar an ardán faoi stiúir Mhike Ó Conaola. Dráma spéisiúil, machnamhach é faoi cheisteanna comhaimseartha na Gaeltachta agus is fiú go mór é a fheiceáil. Beidh ticéid ar fáil ag an doras nó is féidir réamháirithint a dhéanamh ag <https://buytickets.at/ansolasdearg/1175085>

AISTEOIRÍ AN SPIDÉIL

An Solas Dearg

Le hAntoine Ó Flatharta



Seanscoil Sailearna 15ú 16ú 7 17ú Márta 8.00in

ticéid ag an doras

nó ag

www.buytickets.at/ansolasdearg/1175085



CLUB LEABHAR CHOIS FHARRAIGE

Tiocfaidh Club Leabhar Chois Fharráige le chéile ar an 13 Márta le haghaidh oíche airneáin 's ceilúrtha ar an leabhar 'Seanchas Jimmí Chearra Chois Fharráige'. Beidh Pádraic Ó Cearra i láthair ag caint faoin leabhar a chur sé in eagar lena athair Jimmí. Beidh ceol ar an oíche ó Micheál Darby Ó Fátharta agus amhráin nó dhó ó Cholm Jimí Ó Curraoin. Cuirfear tús le cúrsaí @ 8:30 i dTigh Mholly. Tá an ócáid urraithe ag an gCiste Tacaíochta do Sheachtain na Gaeilge chomh maith le Fóram Chois Fharráige um Pleanáil Teanga.

Leabhar Chois Fharráige

seanchas
jimmí chearra
chois fharráige

Caint le
Pádraic Ó Cearra
(eagarthóir)



Ceol le
Micheál Darby Ó Fátharta agus a chairde

Amhráin le
Colm Jimí Ó Curraoin, buaiteoir Chorn Uí Riada

COIS FHARRAIGE
Foras um pleanáil teanga

Conradh na Gaeilge

Seachtain na Gaeilge le eagraire

An Buidéil Teangeolaíochta, Cultúir, Ealaíon, Gaeilge, Spóirt agus Meia
Department of Tourism, Culture, Arts, Gaeltacht, Sport and Media

CLG MICHEÁL BREATHNACH

Tá CLG Micheál Breathnach ag glacadh le baill nua, d'fhoirne faoi aois, faoi láthair. Le himreoir faoi aois a chlárú, chaithfí sonraí thuismitheora/chaomhnóra amháin, ar a laghad, a chlárú chomh maith. Seo a leanas na teagmhálaithe faoi aois atá ag an gcumann don bhliain 2024. Don pheil, is féidir teagmháil a dhéanamh le Paul Ó Neachtain ag peilnanogmb@gmail.com. Do chúrsaí iománaíochta, is féidir labhairt le Caroline Uí Chadhain ag iomaintnanog@gmail.com, nó tá Bridie Uí Chionnaith, cláraitheoir an club, ar fáil ag clarumb1@gmail.com. Iarrtar go mbeadh baill nua cláraithe roimh 31 Márta i mbliana.

SLÁN LE KATIE

Beidh Katie Ní Loingsigh ag fágáil a cuid cúraimí mar Oifigeach Pleanála Teanga i gCois Fharraige le dul i mbun oibre i bpost nua. Ceithre bliana ó shin go díreach a thosaigh Katie ag feidhmiú sa gceantar, an chéad duine a d'fhostaigh an chuideachta nua-bhunaithe Fóram Chois Fharraige um Pleanáil Teanga. Ní raibh sí ach cúpla lá ina post nuair a fógraíodh an dianghlasáil a spreag an phaindéim, ach in ainneoin na ndúshlán mhóra a cruthaíodh dá bharr, d'éirigh le Katie tús láidir a chur le hobair an Fhóraitim, spriocanna an Phlean Teanga a chur i láthair an phobail, eagrais a chur ar an eolas faoi thacaíochtaí an Fhóraitim, córais oibre a leagan síos agus le tacaíocht ó Aoife Ní Chonghaile, an tOifigeach Cúnta a ceapadh i samhradh 2020 tá feidhmiú Phlean Teanga Chois Fharraige ag dul chun cinn go feiceálach. Is cinnte go n-aireoidh pobal Chois Fharraige uathu Katie agus guíonn muid ar fad chuile rath uirthi sa gcéad chéim eile dá haistear gairme.

CORN UÍ CHON CHEANAINN

Reachtálfar Corn Uí Chon Cheanainn ar an 9 Márta. Comórtas amhránaíochta ar an sean-nós atá ann, i gcumhne ar Chiarán Ó Con Cheanainn, an t-amhránaí ó Saile Chuanna i gCois Fharraige, a bhásaigh mí Feabhra 2009, tar éis dó Corn Uí Riada a bhuachan ag Oireachtas na Gaeilge 2008 i gCorcaigh. Bá é an duine ba óige a chroch leis Corn Uí Riada agus bhí sé ag gabháil do PhD ag an am. Aríst i mbliana beidh an comórtas á reáchtáil in Ollscoil na Gaillimhe agus déanfar beoshruthú air ar an leathanach Facebook 'Corn Uí Chon Cheanainn'. Glacfar le hiarratais ó mhic léinn tríú leibhéal go dtí Dé hAoine, 1 Márta.

CLUB SCANNÁN SAILEARNA: SEACHTAIN NA GAEILGE

Mar chuid de Sheachtain na Gaeilge beidh scannán ón Spáinn á thaispeáint le fotheidil i nGaeilge! Seo é an chéad uair do Chlub Scannán Sailearna scannán ó thír eachtrannach a léiriú le fotheidil i nGaeilge. '20,000 Speiceas den Bheach' is ainm don scannán. Baineann scéal an scannáin le cailín óg, ocht mbliana d'aois, a chaitheann tréimhse le linn an tsamhraidh lena Mamó i dTír na mBascach. Is baintreach í Mamó atá tiomanta ag a caitheamh aimsire, an bheachaireacht. Tá an scannán á thaispeáint le tacaíocht ó chiste Seachtain na Gaeilge le Energia. Tá leaganacha den bhunscannán ar fáil i Spáinnis, Bascais agus Francais, ach tá fotheidil i nGaeilge curtha leis an scannán, mar chuid de thionscnamh atá ag Parlaimint na hEorpa le tacaíocht ó Choimisiún na hEorpa. Cuirfear tús leis an scannán ag 8i.n.

COMÓRTAS NUACHT CÚLA4

Tá comórtas á reáchtáil ag Nuacht Cúla4 le ceiliúradh a dhéanamh ar Sheachtain na Gaeilge 2024 agus iad sa tóir ar iriseoirí óga (5-12) ar mian leo a bheith ar an teilifís! An duais a bheas le buachan ná pacáiste nuachta de do chuid féin ar an teilifís, taibléad le scéalta nuachta a thaifeadadh, chomh maith le neart féiríní Nuacht Cúla4! Na treoirlínte a bhaineann leis an gcomórtas ná go gcaithfí mír a mhaireann nóiméad amháin (ar uasmhéid) a thaifeadadh, a chlúdaíonn imeacht reatha nó ábhar suimiúil i do cheantar. Caithfidh go mbeidh an mír réitithe i bhformáid 16:9 (tírdhreach), ar thaibléad nó fón póca. Tá breis eolais le fáil ag www.cula4.com



FOLÚNTAS!

Oifigeach Pleanála Teanga

An duine fuinniúil, spreagúil, cruthaitheach tú?

An cás leat todhchaí na Gaeltachta?

Ar mhaith leat a bheith gníomhach sa bpobal?

An bhfuil taithí agat ar imeachtaí a eagrú?

Tá post againn duit!


Beidh an té a cheapfar ag obair in Oifigí an Fhóraitm sa Spidéal agus ag feidhmiú ar fud Chois Fharraige i gcomhar leis an OPT eile atá fosaithe i gCois Fharraige.

Breis eolais: 086 273 2279 nó ptchoisfharraige@gmail.com

Seol iarratas mar aon le CV chuig: ptchoisfharraige@gmail.com

An Plean Teanga le fáil ag: www.coisfharraige.ie

Spriocdháta: 5.00i.n 15 Márta 2024



Údarás na
Gaeltachta



An Roinn Turasóireachta, Cultúir,
Eolaíocht, Gaeltachta, Spóirt agus Meáin
Department of Tourism, Culture,
Arts, Gaeltacht, Sport and Media



FOLÚNTAIS AG COMHARCHUMANN SAILEARNA

Tá folúntais fógartha le gairid ag Comharchumann Sailearna. Tá Bainisteoir Tograí lán-aimseartha á lorg chomh maith le Riarthóir páirt-aimseartha. Glacfar le hiarratais ar na folúntais seo go dtí Dé hAoine 29 Márta @ 5i.n. Tá gach eolais le fáil ach teagmháil a dhéanamh leis an gComharchumann ar 091 399199, nó ag sailearna@gmail.com

GAELCHARA

Tá Fóram Chois Fharraige um Pleanáil Teanga sa tóir ar chainteoirí líofa/dúchais, chomh maith le foghlaimeoirí Gaeilge le tabhairt faoin scéim ‘Gaelchara’. Scéim teanga atá inti áit a thagann foghlaimeoir Gaeilge agus meántóir (cainteoir líofa/dúchais) le chéile leis an nGaeilge a chleachtadh agus a úsáid. Moltar go gcasann na rannpháirtithe le chéile thart ar uair in aghaidh na seachtaine agus go ndéantar é seo ar feadh trí mhí nó 30 uair an chloig – cibé chén sprioc a bhaintear amach ar dtús! Iarrtar ar an bhfoghlaimeoir dialann a choinneáil le taifead a bheith acu ar an méid atá foghlamtha le linn na scéime. Tá saoirse iomlán ag na rannpháirtithe maidir le cén chaoi a gcaitear a gcuid ama – téann daoine ar shiúlóidí, le haghaidh cupán tae nó caife nó casann daoine eile ar a chéile le taitneamh a bhaint as caitheamh aimsire comónta atá acu. Caithfidh go bhfuil na rannpháirtithe ag cur futhu i gCois Fharraige, agus ní féidir aon ghaol fola nó pósta a bheith ann idir na rannpháirtithe. Ag deireadh na scéime, bronntar €250, chomh maith le teastas ar na rannpháirtithe. Eagraítear oíche shóisialta do na rannpháirtithe freisin. Tá an scéim á reáchtáil ag an bhFóram Pleanála Teanga le trí bliana anuas le breis ‘s seasca ‘Gaelchairde’ ‘theis páirt a ghlacadh inti go dtí seo! Le níos mó eolais a fháil faoin scéim, nó le clárú di, is féidir teagmháil a dhéanamh le optchoisfharraige@gmail.com Bheadh An Fóram sásta dá mbeadh an pobal sásta an scéal a scaipeadh agus an scéim a mholadh do chainteoirí líofa/dúchais agus foghlaimeoirí Gaeilge ar aon.





GAELCHARA

– CHOIS FHARRAIGE –

Ar mhaith leat feabhas a chur ar do chuid Gaeilge?
Ar mhaith leat cuidiú le duine eile a gcuid Gaeilge a fheabhsú?
Tá tú uainn!!

Tá Fóram um Pleanáil Teanga Chois Fharráige sa tóir ar

(a) fhoghlaimeoirí Gaeilge

(b) chainteoirí líofa Gaeilge

le bheith páirteach sa scéim **Gaelchara**

Oibreofar in éindí
lena chéile, leis an
nGaeilge a úsáid níos
minicí sa mbaile agus
sa bpobal.

Bronnfar €250 an
duine ar an
fhoghlaimeoir agus
ar an meantóir.

Tá tuilleadh eolais agus an fhoirm iarratais ar fáil ó:
optchoisfharráige@gmail.com nó 083 010 6294